

- मुख्यमंत्री भजन लाल शर्मा उच्च थर री मीटिंग मांय अहलकारां ने बिजली, पाणी अर चिकित्सा सुविधावां ने दुरुस्त करण रा निर्देश दिया।
- प्रदेश मांय न्यारी-न्यारी ठोडां बत्ती रा तापमान मांय कमी रे बावजूद करडी गर्मी उं जिंदगी माथे असर।
- लोकसभा चुणाव रा सातवां अर आखिरी चरण रा वोट काले।
- देशभर मांय खावण री चीजां मांय मिलावट रोकण सारू सैम्पल लेवण रा मामला मांय राजस्थान पैली ठोड हांसिल करी।

0000

मुख्यमंत्री भजनलाल शर्मा आज ई ऊंचा थर री मीटिंग करणे न्यारा-न्यारा महकमा रा अतिरिक्त मुख्य सचिवां, प्रमुख सचिवां अर सचिवां ने लू रा हालात माथे लोगां ने हर हाल मांय राहत देवण रा निर्देश दिया। मुख्यमंत्री सभागार मांय व्ही बैठक मांय संभागीय आयुक्त अर सगळा जिला रा जिला कलेक्टर ई वीडियो कान्फ्रेंस री मार्फत जुड्या। मीटिंग मांय मुख्यमंत्री जिला कलेक्टरां ने हुकम दिया के गांव अर शहरां मांय लोगां ने बिजली अर पाणी मिलणो चाहिजे। आं दोन्यूं जरूरी सुविधावां रा बारा मांय शिकायतां माथे तुरत निपटारो कर्यो जावणो चाहिजे। वणां अस्पतालां रा हालत सुधारण अर मौसमी बीमारियां उं निपटण सारू जरूरी इंतजाम करण रा निर्देश ई दिया। मुख्यमंत्री अहलकारां ने कह्यो के वे दपतर मांय नी बैठे बल्कि फिल्ड मांय रेरे बंदोबस्तां ने दखे अर वां ने सुचारू करण सारू मेहनत करें।

0000

प्रदेश कांग्रेस अध्यक्ष गोविंद सिंह डोटासरा राज्य री सरकार माथे आरोप मांड्यो है के भाजपा सरकार करडी गर्मी अर हीट वेव रा बंदोबस्ता मांय पूरी तरह नाकाम री है। आज एक वीडियो संदेश काड र श्री डोटासरा कह्यो के सरकार अबे हाईकोर्ट रा हुकम रे पछे मरण वाळा ने मुआवजां देवण ऊं बचण सारू मौत रा आंकडा छुपाय री है। वणां दावो कर्यो के एसएमएस अस्पताल मांय रोज मरण वाळा रा शव आ रह्या है जठे हीटवेव ऊं मौत रे पछे कोई 40 अजान लोगां रा शव मोर्चरी मांय है।

0000

प्रदेश मांय न्यारी-न्यारी ठोडां बत्ती रा तापमान मांय कमी रे बावजूद करडी गर्मी उं लोग परेशान रीया। कोटा मांय काले व्ही बिरखा रे पाछे आज थोडो आराम रीयो। जयपुर मांय काले रे मुकाबले लू रो असर थोडो कम व्हीयो, फेरू ई चूरू मांय आई ई करडी लू चालण रे कारण लोग घरां मांय ई बंद रीया। वठे ई हनुमानगढ मांय आज ई पारो 46 डिग्री सेल्सियस माथे पूग्यो। वठे ई प्रदेश रा सरहदी हलका मांय ई गर्मी उं जिंदगी माथे असर रीयो। सवाईमाधोपुर मांय तेज गर्मी रे कारण आखे दिन बजार सूना रीया। राजसमंद मांय आज पारो 41 दशमलव 5 डिग्री दर्ज व्हीयो। टोंक मांय 44 डिग्री सेल्सियस बत्ती रो तापमान रीयो। मौसम महकमा मुजब आज भरतपुर अर जयपुर संभागां मांय कठे-कठे ई बिरखा व्हेवण री आस जताई है। महकमो कह्यो है के आवता 24 घंटां मांय ई भरतपुर, जयपुर संभाग अर बीकानेर संभाग मांय कठे कठे ई बिरखा रा आसार है।

000000

लोकसभा चुणाव रा सातवां अर आखिरी चरण रा वोट काले पडेला। ई चरण मांय सात राज्यां अर एक केन्द्र शासित प्रदेश री 57 लोकसभ सीटा सारू वोट पडेला। आं मांय उत्तर प्रदेश अर पंजाब री 13-13 सीटां, पश्चिम बंगाल री 09, बिहार री 08, ओडिसा री 06, हिमाचल प्रदेश री 04, झारखंड री तीन अर चंडीगढ़ री एक सीट भेळी है। वोट सवांरां सात बज्यां उं सरू व्हे र सिंज्या पांच बज्यां ताई पडेला। भाजपा रा ठावा नेता नरेन्द्र मोदी अर अनुराग ठाकुर अर कांग्रेस नेता विक्रमादित्य सिंह अर तृणमूल कांग्रेस रा अभिषेक बनर्जी समेत केई खास नेतावां रो राजनैतिक भविष्य काले ईवीएम मांय बंद व्हे लायेला। बेरोकटोक अर साफगोई उं वोट तय करण सारू निर्वाचन आयोग करडा बंदोबस्त कर्या है। मतदान केन्द्रां माथे छाया, पीवण रा पाणी शौचालय व्हील चेर अर बिजली रा माकूल इंतजाम करी ज्या है।

00000

लोकसभा चुणाव रा वोट री गिणती उं पैला आज जयपुर मांय प्रदेश भारतीय जनता पार्टी री दो दिन री मीटिंग सरू व्ही। पैलो दिन भाजपा प्रदेश अध्यक्ष सीपी जोशी भवन निर्माण समिति री बैठक ली, जिण मांय प्रदेश चुनाव सहप्रभारी विजया रहाटकर, महामंत्री जितेन्द्र गोठवाल, उपाध्यक्ष अजयपाल सिंह, कोषाध्यक्ष पंकज गुप्ता समेत समिति रा सदस्य मौजूद रीया। मीटिंग रे पछे मीडिया उं बतळ करता सीपी जोशी कांग्रेस माथे जमने हमलो बोल्यो। वणां कह्यो के राजस्थान रा लोगां रा आशिर्वाद उं विरासत ने आगे बधायी जायेला अर बीजेपी जीतेला। वणां दावो कर्यो के लोकसभा रा नतीजा भाजपा रा पक्ष मांय आवेला।

0000

देशभर मांय खावण री चीजां मांय मिलावट रोकण सारू एन्फोर्समेंट सैम्पल लेवण मांय राजस्थान पैली ठोड हांसिल करी है। भारतीय खाद्य सुरक्षा अर मानक प्राधिकरण कानी ऊं तय लगस रे मुकाबले राजस्थान कोई 3 गुना बत्ती सैम्पल भेळा करणे आ कामयाबी हांसिल करी है। चिकित्सा अर स्वास्थ्य महकमा री अतिरिक्त मुख्य

सचिव शुभ्रा सिंह बतायो के प्रदेश मांय खावण री चीजां मांय मिलावट रे खिलाफ बरोबर सघन अभियान चलायो जा रह्यो है। राजस्थान तय लगस उं बत्ती सैम्पल लेवता 284 फीसदी कामयाबी हासिल करी है। खाद्य सुरक्षा आयुक्त इकबाल खान बतायो के प्रदेश मांय बेगा ई 200 और फूड सेफ्टी ऑफिसर री भर्ती प्रक्रिया पूरी होवण उं मिलावट रे खिलाफ अभियान ने रफ्तार मिलेला अर लोगां ने शुद्ध चीजां री सप्लाई तय व्हेला।

0000

आज तंबाकू निषेध दिवस है। ई मौके प्रदेश मांय जाग जगावण रा कार्यक्रम करी ज्या। जयपुर मांय राष्ट्रीय आयुर्वेद संस्थान मानद विश्वविद्यालय मांय ई मौके लोगां मांय तम्बाकू रा कुप्रभावां रे प्रति जाग जगावण सारू न्यारी-न्यारी गतिविधियां व्ही। संस्थान मांय मुफ्त चिकित्सा शिविर लगायी ज्यो। शिविर रो उद्घाटन चिकित्सालय रा अधीक्षक प्रोफेसर अनुपम श्रीवास्तव कर्यो। शिविर मांय प्रोफेसर अनिता शर्मा तम्बाकू उं होवण वाळा नुकसाण जोग असर रा बारा मांय जाणकारी दी। वणां कह्यो के न्यारी-न्यारी तरह रा नशा री लत उं रोगियां रो आयुर्वेद चिकित्सा पद्धति उं ईलाज करण रे साथे अनुसंधान रो काम ई कर्यो जावे। संस्थान रा कुलपति प्रोफेसर संजीव शर्मा ई मौके कह्यो के आज मोटा शहरां उं ले र गांवा ई हलकां मांय नशा री लत फैशन मांय बदलती देखण ने मिले, जिण रे कारण नौजवान पीढी मांय कम उम्र मांय ई केई कुप्रभाव देख्या जावे। नशा री लत उं दूर रेहर आपां भविष्य अर जिंदगी दोन्यां ने बचा सका हां। विश्व तम्बाकू निषेध दिवस माथे मुख्य चिकित्सा अर स्वास्थ्य अहलकार जयपुर प्रथम री एनटीसीपी सेल शहर रा खास टोडां माथे तंबाकू बेचण वाळा रा कोटपा एक्ट मांय चालाण कर्या। सैल कोटपा एक्ट री धारावां रा बारा मांय जाणकारी देवता 18 साल उं कम उम्र रा टाबरां ने तंबाकू अर तंबाकू उं बण्यां उत्पाद नी बेचण अर सार्वजनिक टोडां माथे तंबाकू उत्पादां री नुमाइश नी कर्या जावण सारू पाबंद कर्या। ई मौके दूजा जिला मांय ई जागरूकता रा कार्यक्रम व्हीया। बूंदी मांय तम्बाकू निषेध शपथ दिरायी ज्यी। ई कार्यक्रम मांय चिकित्साकर्मियां समेत घणी तादाद मांय लोग भेळा व्हीया। इण रे अलावा बूंदी जिला विधिक सेवा प्राधिकरण कानी उं लोगां ने तम्बाकू सेवन रा खतरां री जाणकारी करावण सारू जनचेतना रैली निकाली ज्यी। करौली जिला मांय आज उं राजस्थान राज्य भारत स्काउट गाइड दफतर कानी उं तीन दिन रो कार्यक्रम सरू व्ह्यो। ई दौरान भाषण होड़, निबंध लेखन, नारा लेखन रा कार्यक्रम व्हीया। हनुमानगढ़ जिला रा टिब्बी कस्बा मांय ई जागरूकता कार्यक्रम व्हीयो। सवाईमाधोपुर जिला मांय मुख्य चिकित्सा अर स्वास्थ्य अहलकार डॉ धर्मसिंह मीना जागरूकता रैली ने हरी झंडी दिखा र रवाना कर्या। वटे ई जिला रा सगळा चिकित्सा संस्थानां, कॉलेजां, नर्सिंग कॉलेजां मांय स्टाफ अर मरीजां ने तम्बाकू काम मांय नी लेवण री शपथ दिरायी ज्यी। स्काउट गाइड कानी उं रैली अर होडां रो आयोजन करी ज्यो। पाली रा बांगड़ अस्पताल मांय विश्व तंबाकू निषेध दिवस माथे जागरूकता कार्यक्रम मांय बतायी ज्यो के ब्लड प्रेशर बधावण रो खास कारण नशां, तम्बाकू अर धूम्रपान रो सेवन करणो है। इण ने काम मांय लेवण उं फगत शरीर माथे ई नी बुरो असर पड़े बल्कि इण उं मानसिक स्वास्थ्य माथे ई असर पड़े है। केकडी मांय ई तम्बाकू रो सेवन नी करण री शपथ दिरायी ज्यी।

000000

अहिल्याबाई होल्कर री 299 वी जयंती माथे शाहपुरा जिला मांय न्यारी-न्यारी टोडां कार्यक्रम कर्या जावे। जिला रा अरनिया घोड़ा देवनारायण भगवान रा मंदिर परिसर मांय जिला थर रो सम्मान जळसो व्हीयो। ई दौरान हुनरवान पढेसरा रो सन्मान करी ज्यो। भरतपुर मांय सूरजपोल चौराया माथे अहिल्या बाई री मूरत माथे फूल अर्पण करी ज्या। पाछे शहर मांय शोभाजात्रा निकाली ज्यी, जिण मांय 6 उं बत्ती झांकियां भेळी ही।

00000

जोधपुर ग्रामीण जिला रा खेत मांय बणी पाणी री डिग्गी मांय डूब जावण उं एक ही पिरवार रा तीन लोगां री मौत व्हे ग्यी। पीपाड तहसील रा बाड़ा खुर्द गांव मांय खेत मांय बणी पाणी री डिग्गी मांय एक टाबर रे डूबण रे पछे उण री बहन बचावण सारू डिग्गी मांय उतरी, फेरू ई वां खुद ने नी संभाळ सकी, दोन्यूं ने डूबता देख वां री मां ई पाणी मांय कूद ग्यी अर टाबरां ने बचावण री जतन करी, पण वां ई डिग्गी मांय डूब ग्यी। पुलिस तीनां रा शव काढ र पोस्टमार्टम रे पछे पिरवार जणां ने सूप दिया है। उठीने उदयपुर रा गंगू कुंड मांय डूब जावण उं 2 लोगां री मौत व्हे ग्यी। झुन्झुनूं रा सदर थाना हलका मांय दोरादास गांव मांय व्हीया हादसा मांय एसी मांय भरी जावण वाळी गैस रो सिलेण्डर फाट जावण उं एक मैकेनिक अर उण रा हैल्पर री मौत व्हे ग्यी।

000

केकडी जिल रा बीजवाड गांव मांय एक ब्याव रा जळसा मांय फूड प्वाइजिंग रे कारण 100 बत्ती लोग बीमार व्हे ग्या। पीएमओ डॉ. नवीन जांगिड़ बतायो के सगळा बीमार लोगां ने केकडी जिला सफाखाना मांय भर्ती करायी ज्या, जटे वां रो ईलाज करी ज्यो। जाणकारी मिलण माथे नासिरदा थाना प्रभारी मौका माथे पूग र वटे राख्यी ज्यी खावण री चीजां रो जायजो लियो। ई दौरान खराब मावो काम मांय लिया जावण री बात सामी आई है।

000000